

দৈনিক ইনকিলাব

তারিখ 26 NOV 1992

পৃষ্ঠা ২ ... কলাম ৬ ...

০৫

১৬টি জেলার সকল শিক্ষা প্রতিষ্ঠানে শটহ্যাণ্ড টাইপ বন্ধ করে দেয়া হয়েছে

॥ মোঃ নাছিম উল আলম ॥

যশোর শিক্ষা বোর্ড কর্তৃপক্ষ তার আওতাভুক্ত খুলনা বিভাগের ১৬টি জেলার সকল শিক্ষা প্রতিষ্ঠানে চলতি শিক্ষা বর্ষ থেকে শটহ্যাণ্ড ও টাইপ লিখন বিষয়টি বন্ধ করে দেয়ার সিদ্ধান্ত গ্রহণ করেছে।

সম্প্রতি শিক্ষা বোর্ডের পরিদর্শক কলেজের দপ্তর থেকে জারি করা এক পরিপত্রে সকল কলেজ কর্তৃপক্ষকে বোর্ডের এই নির্দেশের কথা জানানো হয়েছে। বোর্ড কর্তৃপক্ষ তার পত্রে বলেছে যে, ইতিমধ্যেই মাধ্যমিক স্তরে টাইপ লিখন কোর্স বন্ধ হয়ে গেছে এবং অপরাপর বিষয়ের তুলনায় শটহ্যাণ্ড ও টাইপ লিখন বিষয় অত্যন্ত নিম্নমানের, তাই বোর্ড কর্তৃপক্ষ এই বিষয়টির উপর কোর্স চালু না রাখার সিদ্ধান্ত নিয়েছেন। তবে এ ব্যাপারে মন্ত্রণালয়ের কোন সিদ্ধান্ত আছে কিনা তা এ পরিপত্রে বলা হয়নি। অন্য কোন শিক্ষা বোর্ডও শেষ খবর পাওয়া পর্যন্ত এ ধরনের কোন সিদ্ধান্ত নেয়নি। এর ফলে এখন থেকে টাইপ ও শটহ্যাণ্ডের জন্য এর ছাত্র-ছাত্রীদের বেসরকারী পর্যায়ে আরো নিম্নমানের কতিপয় কথিত শিক্ষা প্রতিষ্ঠানের ওপর নির্ভর করতে হবে।

তবে দেশের কয়েকটি জেলাতে সরকারী কমার্শিয়াল কলেজে এই কোর্স এখনো চালু আছে। যশোর শিক্ষা বোর্ডের এই সিদ্ধান্তের ফলে খুলনা বিভাগের অন্ততঃ শতাধিক শিক্ষককেও চাকুরী হারাতে হবে। এ ব্যাপারে বোর্ডের একজন উর্ধ্বতন কর্মকর্তার সাথে আলাপ করা হলে তিনি বলেন, ঐ বিষয় ২টিতে শতকরা ৮০ নম্বরই ব্যবহারিক, ২০ নম্বর তাত্ত্বিক। এর ফলে অনেক নিম্নমানের ছাত্রও পাস করে যায়। এই প্রবণতা এড়ানোর জন্যই কর্তৃপক্ষ উল্লিখিত সিদ্ধান্ত নিয়েছেন। এছাড়াও এ বিষয়ে শিক্ষকের চরম অভাব রয়েছে বলে তিনি জানান। এদিকে বরিশালে কয়েকটি কলেজের ছাত্ররা শিক্ষা প্রতিমন্ত্রী প্রিন্সিপাল ইউনুস খানের কাছে এই বিষয়টি পুনর্বহালের দাবীতে একটি স্মারকলিপি পেশ করেছে। মন্ত্রী বিষয়টি কঠোরভাবে বিবেচনার আশ্বাস দেন।